

Morning Dogri (NSD) National News Bulletin 04-07-2024

आकाशवाणी

- टी-20 क्रिकेट विश्व कप जित्तने परैत भारती टीम नमीं दिल्ली पुज्जी, जित्थें उंदा जोरदार सुआगत कीता गेआ।
- प्रधानमंत्री नरेन्द्र मोदी होरें जकीन दोआया ऐ जे उंदा सरकार मणिपुर च हालात बेहतर बनाने आस्तै लगातार जतन करै करदी ऐ।
- विदेश मंत्री डॉ. एस.जयशंकर होर अज्ज अस्ताना च शंघाई सैह्योग संगठन दी बैठका च भारती शिष्टमंडल दी अगुवाई करगंन।
- ब्रिटेन च अज्ज होन जा'रदे महत्वपूर्ण आम चुनाव च जक्खां बद्ध मतदाता वोट पाने दे अपने हक्कै दा इस्तेमाल करगंन।
- बैडमिंटन च भारत दे प्रियांशु राजावत कनाडा ओपन च मर्दे दे सिंगल्स प्री-क्वार्टर फाइनल च पुज्जी गे न।



Rev. Indian Team

टी-20 क्रिकेट विश्व कप विजेता भारतीय टीम अज्ज बडलै बारबाडोस थमां दिल्ली हवाई अड्डे पर पुज्जी गई ऐ। दिल्ली दे अंतर्राष्ट्रीय हवाई अड्डे पर भारतीय क्रिकेट टीम दे बड़ी बद्ध गिनतरी च प्रशंसक मजूद हे जिनें बड़े जोरें-शोरें उंदा सुआगत कीता। भारतीय टीम बारबाडोस च होए दे महा मकाबले दे मगरा बेटिल तूफान च फसने दी वजह कन्नै वापस पुज्जने च चिर लगा। भारतीय टीम दा मुंबई लेई खाना होने थमां पैहले प्रधानमंत्री नरेन्द्र मोदी हुंदे आवास पर उंदा कन्नै मलाटी करगंन।



PM-Manipur

प्रधानमंत्री नरेन्द्र मोदी होरें आखेआ ऐ जे सरकार मणिपुर च स्थिति गी काबू च करने आस्तै लगातार प्रयास करा'रदी ऐ।

प्रधानमंत्री नै राज्यसभा च राष्ट्रपति द्रौपदी मुर्मू हुंदे अभिभाषण पर धन्नबाद प्रस्ताह दा परता दिंदे होई आखेआ ऐ जे केन्द्र ते राज्य सरकार आस्सेआ मणिपुर च शांति ते रमानदारी ब्हाल करने आस्तै सब्बने हितधारकें कन्ने गल्लबात कीती जा'रदी ऐ। उनें आखेआ जे गृहमंत्री होरें आपूं मणिपुर जाइयै रमानदारी आस्तै प्रयासें दा नेतृत्व कीता। मोदी होरें आखेआ ऐ जे बड्डे अधिकारिएं गी समस्याएं दे हल तुप्पने ते रमानदारी ब्हाल करने दी जिम्मेदारी दित्ती गई ही। प्रधानमंत्री मोदी होरें आखेआ ऐ जे एह गल्ल मन्ननी चाहिदी ऐ जे मणिपुर च हिंसा सरबंधी घटना लगातार घट्ट होआ करदियां न। उनें दस्सेआ ऐ जे मणिपुर च अज्ज स्कूलें, कालेजें, यूनिवर्सिटिएं, दफतरें ते होरने सरबंधी संस्थान कम्म करा'रदे न। प्रधानमंत्री होरें मणिपुर च हाडें दी गंभीर स्थिति पर बी चेंता जताई ऐ। उनें दस्सेआ ऐ जे हाडें आस्तै राहत कम्म लेई राष्ट्रीय आपदा मोचन बल दी दो कंपनियां तैनात कीतियां गेइयां न। उनें आखेआ ऐ जे सरकार राहत ते बचाह कम्म च राज्य सरकार कन्नै रलियै कम्म करा'रदियां न।

<><><><><><>

Jaishankar

विदेश मंत्री डॉ. एस.जयशंकर अज्ज कजाखस्तान दे अस्ताना च शंघाई सैहयोग संगठन-एससीओ शिखर सम्मेलन च भारती प्रतिनिधिमंडल दी अगुवाई करगंन। ओह एससीओ परिषद दे राष्ट्र-अध्यक्षें दी 24मीं बैठक च प्रधानमंत्री नरेन्द्र मोदी हुंदा प्रतिनिधित्व करै करदे न। इस शिखर सम्मेलन दे दरान नेता पिछले दऊं दहाके च संगठन दी गतिविधएं दी समीक्षा ते बहु-पक्खी सैहयोग दी स्थिति ते संभावनाएं पर चर्चा करगंन। बैठक च इलाकाई ते अंतर्राष्ट्री महत्व दे मुद्दें पर बी चर्चा होने दी मेद ऐ। शंघाई संगठन च भारत दियां प्राथमिकतां प्रधानमंत्री हुंदे एसईसीयूआरई एससीओ दे नजरियै पर केन्द्रित न। इत्थें एसईसीयूआरई दा मतलक सुरक्षा, आर्थिक सैहयोग, संपर्क, एकता, संप्रभता ते इलाकाई अखंडता लेई सम्मान ते पर्यावरण संरक्षण ऐ। भारत नै एससीओ दी अपनी पैहली प्रधानता दे तैहत पिछले ब'रे 4 जुलाई गी वर्चुअल माध्यम कन्नै एससीओ मुख्खें दे राष्ट्र-अध्यक्षें दी परिषद दी 23मीं बैठक दी मेजबानी कीती ही। एहदे शा पैहले कल डॉ. जयशंकर होरें संयुक्त राष्ट्र दे महासचिव एल्टोनियो गुतरेस ते कजाकिस्तान, रूस, बेलारेस, उज्बेकिस्तान ते तजिकिस्तान दे विदेश मंत्रिएं कन्नै मलाटी कीती ही। उनें अस्ताना दे पुश्किन पार्क च महात्मा गांधी हुंदी प्रतिमा पर श्रद्धांजलि बी अर्पित कीती।

<><><><><><>

Bihar-MBBS

बिहार दे सेहत मैहकमे नै मैडिकल दे कोर्स लेई हिंदी माध्यम राएं शिक्षा देने दा फैसला लैता ऐ। एह सहूलत बिहार दे सब्बने 21एं कालेजें च उपलब्ध होग, जिंदे च 10 राज्यें सरकारें ते 2 केन्द्र सरकार आस्सेआ चलाए जा करदे संस्थान बी शामिल न। आकाशवाणी खबरें कन्नै गल्ल करदे होई राज्य दे सेहत मंत्री मंगल पांडे होरें आखेआ ऐ जे एह इस ब'रे थमां शुरू होने आले शैक्षणिक सत्र थमां लागू कीता जाग।

<><><><><><>

UK-Election

ब्रिटेन च नमां प्रधानमंत्री चुनने आस्तै अज्ज लक्खां बद्धे मतदाता मते महत्वै आले आम चुनावें च अपने वोट पाने दे हक्के दा इस्तेमाल करगंन। मतदाता भारतीय समें मताबक अज्ज दपैहरी 12 बज्जियै 30एं मिंटे पर शुरू होग ते कल बडलै साढ़े 3 बजे तगर चलोग। मतदान संपन्न होने दे तुरत मगरा वोटें दी गिनतरी आला कम्म शुरू होई जाग तां जे एह फैसला लैता जाई सकै जे देशै दा अगला प्रधानमंत्री कु'न होग। ब्रिटेन दे प्रधानमंत्री ऋषि सुनक होरें मई म्हीने दे खीरै च आम चुनावें करोआने दी घोषणा कीती ही। 14 ब'रे थमां लगातार सत्ताधारी उंदा उदारवादी दल अगले शासनकाल च बने दे रौहने आस्तै जतन करा'रदा हा। इस चुनावें च ब्रिटेन दे इंग्लैंड उत्तरी आयरलैंड, स्काटलैंड ते वैल्स दे मतदाता 650 सांसदीय खेत्तरें च मतदान करगंन। ब'रे 2019 च होए दे पिछले आम चुनावें च 67.3 फीसद मतदान होआ हा।

<><><><><><>

PM

प्रधानमंत्री नरेन्द्र मोदी होरें कांग्रेस गी संविधान दा सब्बने थमां बड्डा विरोधी दस्सेआ ऐ। उनें आरोप लाया ऐ जे कांग्रेस दी मानसिकता अनुसूचित जाति, अनुसूचित जनजाति ते होरने पिछड़े दे वर्गें दा विरोध करने दी रेही ऐ। उनें विपक्षी दल उप्पर साबका राष्ट्रपति रामनाथ कोविंद हुंदा अपमान करने दा बी आरोप लाया ऐ। श्री मोदी होरें आखेआ ऐ जे कांग्रेस नै राष्ट्रपति द्रौपदी मुर्मू हुंदा बी अपमान करने दी कोइ कसर नेई छोड़ी ऐ।

<><><><><><>

Govt. Smart City Mission

सरकार नै आखेआ ऐ जे स्मार्ट सिटी मिशन तैहूत 100 शैहरें अपनी विकास परियोजना दा 90 फीसद कम्म मुकम्मल करी लैता ऐ, जिंदी लागत इक लक्ख 44 जहार करोड़ रपे ऐ। एह मिशन 2015 च उत्थें रौहने आले लोकें गी स्वच्छ टिकाऊ माहौल उपलब्ध करोआने ते बुनियादी ढांचे सरबंधी सहूलतें गी बढ़ावा देने दे मकसद कन्ने शुरू कीता गेआ हा। घरै-मकानें ते शैहरी मामलें सरबंधी मंत्रालय नै आखेआ ऐ जे किश राज्यें ते शैहरें दी सरकारें दे नुमायंदे आस्सेआ ताकीत कीती जा करदी ऐ ते रौहदे 10 फीसद कम्म गी मुकम्मल करने आस्तै थोड़ा होर समां दित्ता जा। मंत्रालय नै उनें सब्बनें लोकें दी ताकीतें गी ध्याना च रखदे होई उनें परियोजनाएं गी मुकम्मल करने आसतै इस अवधि गी बधाइयै 31 मार्च 2025 तगर करी दित्ता ऐ।



PM-Kashmir

प्रधानमंत्री नरेन्द्र मोदी होरें आखेआ ऐ जे जम्मू कश्मीर च आतंकवाद खलाफ लड़ाई हुन अपने खीरी गेड़ च ऐ ते आतंकी ढांचे दा समूलचा नाश करने आली बहुमुखी नीति अपनाई जा करदी ऐ। राष्ट्रपति हुंदे संसद दे दौनें सदनें गी दित्ते गेदे अभिभषण पर धन्नबाद प्रस्ताह दा परता दिंदे होई कल राज्यसभा च प्रधानमंत्री होरें आखेआ जे पिछले 10एं बरें च जम्मू कश्मीर च आतंकवाद सरबंधी घटनाएं च बड़ी मती कमी आई ऐ। उनें आखेआ इनें लोकसभा चुनाएं च भारी गिनतरी च होए दे मतदान कन्ने एह साबत होई गेआ ऐ जे लोकें दा भारती लोकतंत्र च बड़ा गैहरा विश्वास ऐ।



Badminton

बैडमिंटन च भारत दे प्रियांशु राजावत कनाडा आपेन दे मर्दे दे सिंगल्स दे प्री-क्वार्टर फाइनल च पुज्जी गे न। 8में नंबरै दे खडारी राजावत होरें कल शुरूआती दौर च डेनमार्क दे रासमस गेमके गी 17-21, 21-16, 21-14 कन्ने हराया। उत्थें गै एस. शंकर मुथुसामी सुब्रमण्यम राउंड ऑफ 32 च फ्रांस दे खडारी एलेक्स लानियर थमां 21-16, 21-17 कन्ने हारी गे।

आयूष शेट्टी गी बी जापान दे कोकी वतनबे थमां 21-14, 21-11 कन्नै हार दा सामना करना पेआ। महिलाएं दे सिंगल्स च अनुपता उपाध्याय आयरलैंड दी खडारन राचेल दार्राग गी 21-11, 21-11 कन्नै हराइयै रांड 16 च पुज्जी गोइयां न। तान्या हेमंथ नै बी कनाडा दी जैकी डेंट दे खलाफ 21-13, 20-22, 21-14 कन्नै जित्त दर्ज कीती। मिक्सड डबल्स च रोहन कपूर ते शिवानी रूथविका दी जोड़ी नै हमवतन तरुण कोना ते श्री कृष्णा प्रिया गी 21-9, 21-9 कन्नै हराइयै प्री-कवार्टर फाइनल च थाहर बनाई लैती। अज्ज ट्रासा जॉली ते गायत्री गोपीचंद दी भारती जोड़ी महिला दे डबलस दे राउंड 16 च डेनमार्क दी एलिसा ते जतास्जा कन्नै खेडोग।

<><><><><><>